

# Churwalden e Parpan

Regiun colonisada durant il temp autmedieval tras la claustra da Curvalda

■ Sco quai ch'il num Curvalda trade-scha, furmava la cuntrada survart Cuira a la ruta dal Set oriundamain ina vasta regiun da guaud. Enturn il 1150 è vegnida fundada qua ina claustra da premonstratens che dueva influenzer a moda decisiva l'urbanisaziun e colonisaziun da la regiun. Suenter la reformaziun (1527) è il convent quasi vegni schlià, cumbain ch'in avat è anc restà en uffizi fin il 1599 ed in administratur dals bains fin il 1803.

## Premonstratens

L'Urden dals premonstratens è vegni fundà il 1120 da s. Norbert a Prémontré sper Laon (Picardie). L'urden, obligà a las reglas da s. Augustin, sa deditgava al predegiar ed ad ina vita claustrala severa. A l'entschatta aveva l'urden era numerus fraters laics che s'occupavan da l'agricultura e da l'artisanat. Durant ils emprims tschientaners devi era in urden da mungias premonstratensas.

En Svizra è l'urden s'installà l'emprim al Lac de Joux en il Giura; las emprimas abazias da Humilimont e Bellelay èn vegnidas fundadas enturn il 1137. Il 1140 èn muntgs da quest urden probablmain vegnids a S. Glièzi/Cuira, nua ch'igl existiva gia dapi il temp medieval tempriv ina comunità spirituala che viveva tenor reglas claustralas; attestada è la preschientscha dals premonstratens il 1149 cun il rinviament a las reglas da s. Augustin. Prendi dimora han els probablmain sut l'uvestg Konrad von Biberegg ch'era in fauttur da la claustra da premonstratens a Roggenburg en Baviera. Il 1209 appartegneva a S. Glièzi era la claustra da S. Hilari/Cuira ch'era situada sin ina terrazza da la vart sanestra da la Plessur ed en la quala vivevan mungias en clausura. A partir da S. Glièzi han muntgs premonstratens fundà a Curvalda sper la baselgia da S. Maria ina nova claustra. La *Augeria silva* (guaud d'ischis), sco quai che la regiun da la Val Curvalda vegniva nummada da quel temp, era ina vasta cuntrada da guaud situada sin territori dals signurs de Vaz. En quest lieu han ils premonstratens cumenzà a runcar il guaud, urbanisar il terren, introducir la cultivaziun dad ers ed a segirar e promover cun lur ospizi la via vers sid (Via Sura). La lavur da runcada era l'ovra dals fraters laics e da purs subdits e purs libers ch'eran sa mess sut la protecciun da l'imunità claustrala. A Curvalda existiva oriundamain durant ca. 100 onns era ina claustra da mungias.

L'onn 1206 han muntgs da Curvalda fundà a Turitg la claustra da premonstratens da Rüti ch'è sa sviluppada en il temp medieval tardiv ad in dals centers economics impurtants. A partir da Curvalda han els era fundà il 1222 la claustra da S. Giachen a Claustra. Il lieu entadim il Partenz sa numava quella giada simplmain S. Giachen



Ils vitgs da Curvalda (foto) e Parpan èn sa sviluppsads a centers turistics.

en il guaud (*in silva*), quai ch'è in'ulteriura cumprova che la colonisaziun per propi ha cumenzà en quest lieu pir cun la fundaziun da la claustra. Sco en la Val Curvalda han purs rumantschs runcà e colonisà quest territori; da quai dattan perditga ils numerus numms rumantschs da lieus e culturis. Pir en il decurs dal temp medieval tardiv è vegnida integrada en il process da colonisaziun era gliעד da lingua tudestga.

Ils temps da fluriziun da l'Urden dals premonstratens èn stads il 12avel ed il 13avel tschientaner, cura che lur members sa distinguevan tras lur fervenza religiusa e lur activitads per la furmazion da la cuntrada. La crisa agricula ed ina moralà per part degressiva durant il temp medieval tardiv han mess plaun a plaun las claustras en ruina. Durant il temp da la reformaziun èn vegnidas serradas tranter il 1525 ed il 1530 la claustra da Rüti e trais claustras en il Giura ed il 1548 era il convent a Claustra. A partir dal 1536 è la claustra da Curvalda ida pli e pli en decadenza. En il decurs da la Revoluziun franzosa èn alura vegnidas schliadas las davosas claustras da premonstratens, tranter quellas il 1797 Bellelay e Grandcourt, il 1804 S. Glièzi/Cuira ed il 1807 Curvalda. *Martin Bundi*

## Curvalda (claustra)

Veglia abazia premonstratensa (prepositura fin il 1446) en la vischnanca da Curvalda. Filiala da l'abazia da Roggenburg (Baviera). Claustra-mamma da S. Giachen/Claustra e fin il 1230 da Rüti/ZH, provinza (*circaria*) da Svevia. 1149 *in silva Augeria*, 1191–1275 *de Curvalde*. Patrocinis: S. Maria e S. Mitgel. L'abazia, fundada enturn il 1150, è vegnida bandunada suenter la reformaziun e serrada uffizialmain il 1803/07.

La fundaziun legendara da Curvalda tras ils baruns de Vaz para plausibla. Ils de Vaz, donaturs principals da la claustra, eran avugads ecclesiastics e vegnivan inhumads, sco quai ch'ina exchavaziun dal 1968 cumprova, en la claustra. Lur successurs èn stads ils conts von Toggenburg fin il 1436, alura ils von Montfort fin il 1466/70, ils von Matsch tranter il 1471 ed il 1477 ed ils de Habsburg-Austria a partir dal 1477. Il coc da la donaziun, la baselgia da Nossadonna, appartegneva il 1149 gia a l'abazia da S. Glièzi/Cuira. Ina revolta dals confrars laics para d'avair provocà il 1208 la partenza dal prevo e da ses fidaivels sco era la fundaziun da la prepositura da Rüti. En ils onns 1208 e 1311 èn attestadas canonissas a Curvalda; la baselgia da S. Maria e S. Clau, construïda en il 13avel tschientaner sco successura da la baselgia da S. Maria dal 1149, vegn attribuida a quellas. Ses chor flancà da duas turs ha conferi a la baselgia in aspect caracteristic e visibel fin viaden il 19avel tschientaner. A partir dal 1210 ha Curvalda possess in ospital cun in'atgna chaplutta. La baselgia dal convent dals canonis, deditgada a s. Mitgel (pli tard a s. Maria e s. Mitgel) ed erigida en stil romanico enturn il 1250 var 250 m al nord da la baselgia da S. Maria, è daventada victima d'in incendi il 1472. Ella è vegnida remplazzada tras la baselgia-sala anc oz existent, construïda en stil gotic tardiv e consecrada il 1502. Ils altars cun-

tegnan retabels da la Germania dal Sid e las picturas muralas èn attribuidas al Maister da Vuorz. La chasa annexa da l'avat, construïda en furma da tur, datescha dal 15avel tschientaner. Il 1527 ha il cumin da Curvalda, ch'aveva adoptà parzialmain la cretta reformada, avugadà e confiscà ils edifizis da l'abazia ed alienà ses bains. Il 1536 aveva Curvalda mo pli in avat titular (senza convent) ch'è vegni substituì il 1600 tras in administratur, nominà da l'abazia-mamma da Roggenburg ch'aveva era surpiglià ils debits creschents da Curvalda. Suenter la dissoluziun da Roggenburg il 1803 èn ils bains patrimonials restants da Curvalda passadas al Seminar da spirituals S. Glièzi/Cuira ed il 1877 da quest a la plaiv catolica da Curvalda.

La culegna en la Val da Curvalda, che s'extende da nord da Malix fin a Parpan, era sortida da l'urbanisaziun promovida tras la claustra en il 13avel tschientaner. Documents cumprovan ch'ella aveva oriundamain era possess en la Tumleatgga, en il Scanvetg ed en la Val dal Rain da Cuira sco era auters, main impurtants, a Vaz ed en la Val d'Alvra. La claustra era sa separada suenter pauc temp da la plipart da ses emprims acquists en la Rezia Sut ed ella aveva adina in'atgna economia cun atgnas alps. Ils possess pli lontans ils pli impurtants eran las migiurias a S. Margreta/Cuira, Maiavilla ed Altenstadt (Feldkirch). La giurisdicziun bassa abaziala è stada probablmain ina da las premissas fundamentalas per la creaziun dal cumin da Curvalda. Enturn il 1500 consistiva la plipart dals bains claustrals da feuds purils ereditars, entant che Curvalda aveva concedi paucs decennis pli baud feuds liads ad in contract da fittanza (tudestg Schupflehen). Malgrà ils sforzs constants dals servs claustrals per megliar lur status giuridic, han subsistì restanzas da sclavitid fin a l'entschatta dal 16avel tschientaner. *Florian Hitz*

## Churwalden (Curvalda)

Vischnanca politica, circul Curvalda, district Plessur, situada sur la Rabiusa a la via per Lai, cun Passugg, Araschga, insaquant aclauns e bains sparpagliads ed a partir dal prim da schaner 2010, tras fusiun, las anteriuras vischnancas politics da Malix e Parpan. 1149 *in silva Augeria*, 1191–1275 *de Curvalde*, tudestg Churwalden (uffizial), 1623 ca. 575 abitants; 1850 695; 1900 620; 1950 815; 2000 1236. Chats da munaidas dal temp roman. La vasta regiun da guaud a la via dal Set (ospizi menziunà il 1210) è vegnida urbanisada per gronda part en il temp autmedieval sin iniziativa da l'abazia premonstratensa da Curvalda. Colonisaturs dal sid da la Germania, ma era da derivanza rumantscha e gualsra, han colonisà la regiun a partir da la migiuria abaziala. En il 16avel tschientaner era Curvalda gia germanisà. Ultra da la baselgia da S. Maria, attestada il 1149, è vegnida con-

struida quella da S. Maria e S. Clau che vegn attribuida a las canonissas (13avel/14avel tschientaner), e quella da S. Mitgel (13avel tschientaner) per ils premonstratens che serviva a medem temp a la plaiv. Dapi il 1599 administrava in avugà il possess da la claustra bandunada, entant che la baselgia claustrala è vegnida utilisada dal 1616 fin il 1967 medemmain da la plaiv reformada. Il 1275 eran ils baruns de Vaz ils possessurs dal signuradi da Strassberg (chastè en vischinanza da Malix), suenter il 1338 successivmain ils von Toggenburg, von Montfort e von Matsch. Il 1436 è la dretgira da Curvalda, resortida da quest signuradi e da l'avugadia claustrala, s'unida a la Lia da las Diesch Dretgiras. Dapi il 1471 proponiva Curvalda al landfoct trais candidats per la tscherna dal mastral. Il 1649 ha Curvalda cumprà ora ils dretgs austriacs. Las funtaunas d'entrada tradiziunales eran l'allevament da muvel, l'agricultura ed il traffic da transit lung la Via Sura (Gügli/Set), nua che Curvalda furmava cun Lantsch in port (società da transport). Ina via charrabla è vegnida construïda tranter il 1834 ed il 1840. Il 1851 è il cumin da Curvalda, che cumpigliava ils vischinadis da Malix, Curvalda, Parpan e Tschierscha, vegni transformà en in circul, al qual è vegni incorporà era Prada. Dapi la mesadad dal 19avel tschientaner è la vischnanca da Curvalda daventada enconuschenta per sias curas d'aria e da scharun. A partir dal 1961 ha la construcziun da runals e sutgeras promovì il svilup turistic. Il 1986 quintava Curvalda 2053 letgs per esters, 58 % da quels en abitaziuns secundaras. Il 2005 lavuravan 31 % da las persunas cun activitad da gudogn a Curvalda en il sectur secundar (setgentarias da charn), 54 % en il sectur terziar. *Jürg Simonett*

## Parpan

Anteriura vischnanca politica, circul Curvalda, district Plessur. Fusiunada il 2010, ensemen cun Malix, cun Curvalda. Vitg accumulà en la Val Curvalda. 1208 *Partipan*; rumantsch Parpaun, antiquà). 1623 ca. 220 abitants; 1850 92; 1900 62; 1950 89; 2000 263. Singul chat dal temp da bronz. La regiun a la ruta dal Pass dal Set, cuverta antruras da gronds guauds, è vegnida colonisada durant il temp autmedieval tras la claustra da Curvalda. Las emprimas culegnas a Parpan èn vegnidas fundadas da colonists rumantschs en il 13avel tschientaner. Il 1275 cumparan ils baruns de Vaz sco possessurs dal domini da Strassberg, a partir dal 1338 ils Toggenburgs, Montforts e Matschs. Il 1436 è s'uni il cumin da Curvalda – che provegniva dal signuradi da Strassberg – ensemen cun il vischinadi da Parpan a la Lia da las Diesch Dretgiras. Il 1649 è sa liberà Parpan dals dretgs signurils austriacs. La chaplutta da S. Peder appartegneva a Vaz. La baselgia da S. Anna è vegnida erigida enturn il 1500. La pravenda exista a Parpan dapi il 1517, quella reformada dapi il 1560. La germanisaziun è stada terminada a Parpan en il 16avel tschientaner. Las funtaunas d'entrada tradiziunales eran l'allevament da muvel, las minieras d'arom e d'argient (15avel–19avel tschientaner), la vaschlaria (18avel tschientaner) ed il traffic da transit. Il stradun è vegni construì ils onns 1824–40. A la fin dal 19avel tschientaner è s'establì Parpan sco lieu da cura da stad. Runals da skis existan dapi il 1953. Il 2005 lavuravan 77% da las persunas cun activitad da gudogn a Parpan en il sectur terziar. *Jürg Simonett*



Il complex da la claustra da Curvalda l'onn 1795.

## Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiu online: [www.e-lir.ch](http://www.e-lir.ch); versiu stampada: [www.casanova.ch](http://www.casanova.ch) u en mintga libreria.